

Disklêriadur Brusel evit ur c'henober etrebroadel war dachenn an dermenadurezh

Dileuridi ar c'hevredigezhioù broadel hag etrebroadel, ar rouedadoù hag ar c'hreizennoù teuliaouiñ war an dermenadurezh,

dre m'eo hollvezant an dermenadurezh en holl obererezhioù mab-den,

dre ma ouzont mat pegen prizius eo an dermenadurezh a-benn treuzkas titouroù er c'hehentiñ arbennikaet, hag ivez pegen pouezus eo he roll a-benn kadarnaat ha brudañ al liesseurted sevenadurel ha yezhel,

dre ma anzavont an ezhomm zo da lakaat an dud a vicher hag an divizourien da gompren pegen talvoudus eo an dermenadurezh evel benveg kehentiñ ha treuzkas gouiziegezhioù,

dre ma verkont o deus ezhomm an dermenadurourien a vicher da zerc'hel kont eus prederioù, ezhommoù ha c'hoantoù an implijerien en o hentennoù labour,

dre ma anzavont an ezhomm zo da gaout kenlabour etre an holl oberourien ha kevrennoù eus ar bed a-bezh, ha dreist-holl, an ezhomm zo da genurzhiañ an eskemm bankoù termenadurezh,

dre ma kemeront preder da greñvaat an danframmoù a grou hag a skign termenadurezh,

a c'halv ar Stadoù hag ar gouarnamantoù, an aozadurioù etregouarnamantel hag etrebroadel koulz hag an ensavadurioù empleget er politikerezhioù yezh :

- *da harpañ* krouiñ danframmoù termenadurezh er stolloù armerzhel bras evel Europa ha danvez Tachad Frankeskemm an Amerikaoù (FTAA), ha da sikour an danframmoù termenadurezh zo anezho dija ;
- *da vroudañ* savidigezh politikerezhioù termenadurezh e-barzh ar programmoù stummañ, kelaouiñ hag all ;
- *da gas war-raok* an hentennoù kenlabour a zalc'h kont eus disoc'hoù ar pezh zo bet graet dija hag eus an oberoù hag ar raktresoù zo bremañ ;
- *da harpañ* oberoù evit kizidikaat ar greanterezhioù hag ar melestradurezhioù foran da gemer perzh el labour termenadurel ;
- *da aesaat* sevel programmoù arc'hantañ a-ratozh evit al labour termenadurel, ha dreist-holl evit kas war-raok hag hizivaat an termenadurezhioù ;
- *da atizañ* an ajañsoù skoueriekaat broadel da gemer perzh da vat en ensavadurioù reoliñ (evel Poellgor Teknikel 37 an Aozadur Skoueriekaat Etrebroadel (ISO) « Termenadurezh ha danvezioù yezhel all »), en ensavadurioù karget da gendoniañ kudennoù an dermenadurezh er bed a-bezh hag en ensavadurioù a reol ar Genrouedad evit ma vo gwelet an holl dibarderioù sevenadurel ha yezhel ennañ ;
- *da harpañ* an oberoù e-sell da implijout an dermenadurezh evel ma tere, dreist-holl en holl liveoù kelenn hag arbennikaat, er skolioù-meur pe e lec'h all ;

- *da gelenn* dre ret an dermenadurezh hag ar yezhoù arbennigourien e pep kursus war an treiñ ha da aesaat an ober ganti en holl danvezioù kelenn, er re a bled ganti ar skiantoù hag an teknikoù dreist ar re all ;
- *da harpañ* ar c'hendivizoù etre ar broioù a implij ar memes yezh, hogen ganti reoladoù yezhel disheñvel, a-benn kendoniañ ar c'hrouiñ gerioù nevez hag ar skoueriekaat termenoù, en ur zerc'hel kont eus seurtadoù disheñvel ar yezh, diouzh pennaennoù al lec'helaat hep disoñjal ar c'hengompren zo ezhomm anezhañ ;
- *da vroudañ* al liesyezhegezh koulz er c'helenn hag en implij melestradurel ha foran ;
- *da aesaat* skignañ an termenadurezhioù ha reiñ an tu d'an dud d'o c'haout digoust, dreist-holl ar re zo e teulioù ofisiel ar gouarnamantoù hag an ensavadurioù etrebroadel ;
- *da studiañ* gwir implij ha roll an dermenadurezh e diarbennoù strategel ha politikel liesseurt ar gouarnamantoù hag an ensavadurioù ;
- dre ma'z eus muioc'h-mui a vroioù o kregiñ da lakaat war-sav politikerezhioù yezh, *da stummañ* o arbennigourien war bennaennoù hag hentennoù an dermenadurezh, diouzh an diorren padus, ha reiñ skoazell d'an arbennigourien-se ar muiañ ma c'haller, evit ma c'hellfent kemer perzh da vat en obererezhioù etrebroadel an dermenadurezh.